

Edizioni

- letto 716 volte

Wallensköld

I.

A enviz sent mal qui ne l'a apris:
guerir l'estuet ou morir ou remaindre,
et li miens maus, las! dont je ne m'os plaindre,
icil par est seur touz poosteïs.
morir en vueil, mès quant me vient devant
l'esperance de la grant joie ataindre,
lors me confort. Voire, qui poïst tant
sousfrir en pais, mès ne puis, ce m'est vis! [8]

II.

Et cil qui est d'Amors si entrepris
qu'il li estuet a sa volenté maindre,
mult me merveil s'Amors se puet tant faindre
vers moi, qui sui a ma dame ententis;
despuis que vi son biau cors droit et gent
et son cler vis, qui trop m'i set destraindre,
nel cuidai pas trouver si decevant
conme il estoit; oncor m'en va il pis. [16]

III.

Mès cil qui sert et merci i atent,
cil doit avoir joie fine et entiere;
et je, qui n'os vers li fere proiere
- tant par redout son escondisement -,
g'en deüsse partir, voire par foi,
mès je ne puis veoir en quel maniere.
Estre ne puet ensi, a li m'otroi,
qu'en mon dangier n'est ele de noient. [24]

IV.

Dès ore mès vueil prier en chantant,
et, se li plest, ne me sera tant fiere,
car je ne cuit que nus hons qui requiere
merci d'amors, qu'il n'ait le cuer plorant,
que, se Pitiez li chiet aus piez por moi,

si dout je mult qu'ele ne la conqiere.
Ensi ne sai se faz sens ou foloi,
car cist esgarz va par son jugement. [32]

V.

Se ma dame ne prent oncor conroi
de moi, qui l'aim par si grant couvoitise,
mult la desir et, s'ele me desprise,
Narcisus sui, qui noia tout par soi.
Noiez sui près, loing est ma garison,
s'entendré je touz jorz a son servise.
Servir doi bien pour si grant guerredon;
mult voudroie qu'ele en seüst ma foi. [40]

VI.

Dame, merci! Qu'aie de vos pardon!
Se je vous aim, ci a bele entreprise.
Je ne puis pas bien couvrir ma reson,
si le savez encor, si con je croi. [44]

- letto 483 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-384>